

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

AOKUSO 2024

email: sulusamoa@cccs.org.ws -Main Office: Ph. 24414, Ext 29 - website: www.cccs.org.ws

OSIGA FEAGAIGA EFKS LEPEA, FALEATA.



Misipalauni Faatau FT, Dr. Arthur Wulf FS, Fiso Lakisa AM & Felicity @EFKS Lepea

**OSIGA FEAGAIGA, EFKS VAI O LE OLA,
MATAGALUEGA AMERIKA**



O LE FAASINO UPU

1. *O LE LAUGA*....2
2. *Osiga Feagaiga, EFKS Vai o le Ola*.....3
3. *Osiga Feagaiga, EFKS Lepea*....4
4. *Aufailauga Sulu Samoa 2025*.....4
5. *O Taofiga tau le A'oa'oina*...5
6. *O le Perofeta Mulimuli*...9
7. *Feau mo Aso Sa Tama 2024*.....13
8. *O e ua fai i lagi folauga*...14
9. *Ata o mataupu lomía*...16

O LE LAUGA

Tusi Faitau: Salamo 46:1-3

Matua: Salamo 46: “*I O le Atua, o lo tatou malu ia ma lo tatou malosí; e fai o ia ma fesoasoani silisili i puapuaga.*”

Manatu Autu: **O le Atua o lo tatou malu i taimi o puapuaga.**

Fa'atomuaga:

O le olaga lenei o lo'ó tatou ola ma soifua ai, o le olaga ua faatusaina i aga ma uiga masani o peau o le sami, e i ai taimi e malū ai ma taoto lelei ai le au peau pe a oo ina to'a lelei le tai, a e i ai foi taimi e fesouaina ai ma souā ai peau o le sami pe a oo ina siisii ma lualuta le tai. E faapena uiga o le olaga, a oo i le taimi e sologa lelei ai le olaga, e sologa lelei foi mea uma tatou te fai, a e a oo loa ina tutupu puapuaga i lo tatou ola, ona lē mautonu loa lea ma tuufesilisili manatu ma lagona pe aisea ua mafua ai. A o le taimi tonu lea e moomia ai se tautai matapalapala, taimi o le souā, a e leai a se tautai tatou te malu ai i taimi o puapuaga, ua na o le Atua lava; auā o lea lava ua tatou molimauina i le gasologa o le olaga o loo tatou ola ai, e lē faigofie, e lē taugamalie foi pe a o'ó mai puapuaga e fesouaina ai lo tatou ola. E tupu ai le fefe ma le atuatuvaile o le loto. E lagona ai le popole ma le lē mautonu. E lē maua'a ai le ola faatuatua, lea e mafua ai ona tuufesilisili manatu ma lagona. O le tāua lena o le tatou iloa o le Atua e ala i le faatuatua, o le Atua o lo tatou malu i taimi o puapuaga.

Feagaiga Tuai:

E faapena se feau tāua o loo taoto i le Salamo lea e 46. O le Salamo o loo matua faamatietie ai e le

fai salamo le tautinoga a le tagata faatuatua, i taimi e oo mai ai puapuaga ma fetaia'i ma lona soifua galue. O upu tomua lava o le tautinoga a le tagata faatuatua, o loo taoto ai le aano moni o mafauauga o le fai salamo, e pei ona i ai ana upu ua fai ma matua o le Lauga, lea na tautino ai e le fai salamo: '*O le Atua, o lo tatou malu ia ma lo tatou malosí; e fai o ia ma fesoasoani silisili i puapuaga.*' O le tautinoga o le faatuatua ua tatou iloa ai, e masani lelei le fai salamo i le natura alofa laveai o lona Atua. Atonu o le mafuaaga foi lea o le faaosofia o lagona o le fai salamo e tusia loa ia upu o lana tautinoga. O le fesili, aisea ua talanoa ai le fai salamo i ia upu ua fai ma ana tautinoga o le faatuatua i luma o le Atua? O a foi puapuaga na fetaia'i ma ia na afua ai ona ia tautino i le malosí ma le silisiliese o lona Atua?

E i ai le manatu atonu o le fai salamo le isi tagata na matuai iloga ona manu'a lona loto ina ua tutupu puapuaga i lona nuu, aemaise le tulaga mata'utia lea na faaumatia ai e Sanerivi ma le malo o Asuria le malo o Iuta ma le aai pele i Ierusalemā, taimi lea o aveā ai Esekia ma tupu o sã Iutā i lea vaitau. O puapuaga ia na oo ia sã Iutā ma le manatu ailoga a toe i ai se faamoemoe ola o totoe mo i latou, ma ua lē mautinoa ai foi ma so latou lumanai manuia. Peitai, e ese le mata'utia ma le ofoofogia o mea e faia e le Atua. E tapena e le Atua ona tagata i taimi e fesouaina ai i puapuaga, pe afai e iloa e le tagata ona salamō ma toe foi i le Alii. E leitioa foi a saafi le fai salamo, o le Atua o loo tatou malu ia ma loo tatou malosí; e fai o ia ma fesoasoani silisili i puapuaga, auā ua ia mautinoa lelei, o le Atua e toomaga ma sulufai i ai le tagata faatuatua i taimi o puapuaga. Po o a lava la puapuaga ia na oo mai ma fesouaina ai lona ola galue mo le Atua, e lei toe fefe pe na popole ai o ia, auā o lea lava na ia tautino, pe faaliliuina le lalolagi, pe luluina mauga, pe sousou foi le suasami, e leai lava se mea e toe atuatuvaile ai o ia, auā ua ia mautinoa o le Atua e malu ai o ia, lea na ia faatusaina e peiseai o se olo maualuga e fa'aaogaina i le taimi o taua ma ona fili, a o le ata manino o le Atua o le tali pupuni ma le puipui malosí i taimi e osofaia ai le tagata faatuatua e puapuaga o le ola.

Fa'atatau:

Le Ekalesia e, ma le mamalu o le au faitau i lenei nusipepa faaleagaga, o lea foi se faamanatu tāua o le Talalelei mo i tatou uma. O le Atua o loo tatou

malu ia i taimi o puapuaga. O lona uiga, pe a oo mai puapuaga ma fesouaina ai lo tatou soifua galulue mo le feau ma le galuega a le Atua, ia 'aia nei galo, o le Atua lava tatou te toomaga i ai, o le Atua tatou te sulufai i ai, o le Atua tatou te saili fofō i ai, a e 'aia tatou te faalagolago i lo tatou iloa po o lo tatou malosi. O le mafuaaga foi lena e ala ai ona tatou faavaivai gofie ma tatou ola pala'a'ai, ma tatou solomuli gofie, ma tatou toilalo gofie i taimi e lutia ai i tatou i puapuaga, aisea? Auā ua tatou lē toomaga i le Atua i taimi o puapuaga, ua tatou lē saili fofō foi i le Atua ma saili fesoasoani ia te Ia, a e ua tatou faamoemoe i lo tatou iloa ma lo tatou malosi. O taimi ia e mate ai lo tatou ola faatuatua, ma tauau ai ina leai ai so tatou faamoemoe, a o lea ua faamanatu mai le fai salamo, o le Atua o lo tatou malu ia, tatou toomaga i le Atua, a e aua tatou te toomaga i mea faafiafia o le olaga nei, auā ua lē utuvā le mau faafitauli ua tutupu i nei aso, aemaise ai le toatele o i latou ua toomaga i le ava malosi ma fualaa faasāina. O le fagufagu lea a le Talalelei i lenei foi vaitau o la tatou savaliga faale-faatuatua, e lē o le ava malosi ma fualaa faasāina le fofō pe a oo ina tutupu puapuaga i lo tatou ola, ua na o le Atua lava tatou te toomaga i ai, o Ia o lo tatou maluapapa i taimi o le souā ma le olo maualuga i taimi o puapuaga, o lo tatou malosi Ia e tatou te fa'auau ai lana galuega, o lo tatou fesoasoani silisili foi o Ia i taimi faigata o le olaga lenei o loo tatou ola ma soifua ai.

O Ia lava foi na toomaga i ai lo tatou Alii o Iesu Keriso i toe taimi o ona puapuaga, seia oo ina ua Ia toe faatuina mai lo tatou Alii mai le oti ma le tuugamau, ua saga faamausaliina ai le tautinoga a le tagata faatuatua e pei ona fai mai le tatou matua, *'O le Atua o lo tatou malu ia ma lo tatou malosi; e fai o ia ma fesoasoani silisili i puapuaga.'* Ia manuia tele feau ma galuega o lenei masina i le tatou Ekalesia Aoa o Samoa nei ma Atunuu e mamao. Ia faamanuia foi le Atua i lana Upu folafola ua tau ala atu i lenei nusipepa faaleagaga. Ia tumau i le Atua le viiga, le faamanu ma le faaneetaga, nei seia oo i le faavavau, faavavau lava. Amene.

Saunia e Francisco Lawrance Fatu (FS)

EFKS Gagaifolevao,

Pulega Lefaga & Faleaseela,

Matagaluega AANA.

OSI FEAGAIGA **EFKS VAI OLE OLA.**

O le aso 3 Aokuso 2024 na faataunuu ai le Osiga-feagaiga a le EFKS Vai O le Ola, i le aai o Lakewood Kalefonia USA, ma le latou Faifeau le Susuga ia Petero Taufagu ma le Faletua ia Soa. O le Susuga ia Petero ma le Faletua o le Aoa i'u mai le Seminara a le EFKAS i Kanana Fou, Amerika Samoa. Sa faatumulia le sauniga i lea aso i le paia o le Matagaluega Amerika, faapea le paia o aiga ma uo a le Susuga i le A'oa'o ma le Faletua. O le Susuga ia Leaoga Tanuvasa FT o le Toeaina o le Pulega Tutotonu sa taitaia le sauniga ma faatino le osiga o le feagaiga. O le Susuga i le Toeaina o le Pulega i Matu Saitumua Tafaofalii FT sa feagai ma le lauga, o le Susuga i le Toeaina ia Suitulaga Faii FT (Kanana Fou) sa tatalo, o le Susuga i le Toeaina ia Peni Taito FT (Kanana Fou) sa faitauina Afioga Paia a le Atua. O le Aoa Fesoasoani ia Faaea Tulifau sa fai ma sui o le Ekalesia, e fofogaina mo le silafia e le aofia, le faiga filifiliga a le aulotu a o tau saili so latou ta'ita'i, o ia foi sa tausia le Ekalesia a o faatali so latou Faifeau. Sa maua foi le avanoa o le Susuga ia Petero Taufagu e faafetaia ai le Ekalesia o le Vai O le Ola ona o lo latou filifilia o laua, e fai ma o latou Faifeau, ma ia faafetai i o la aiga mo le latou tapuaiga tatalo. Na tualuga le sauniga i lea aso i le Faamanatuga na feagai ma le Susuga i le Toeaina o le Pulega i Saute o le Komiti Faatonu o le Matagaluega a Amerika Rev Elder Makerusa Porotesano. E masani lava ona saunia e le Faifeau na osifeagaiga ma le aulotu le Faamanatuga e pei ona masani ai, peitai o le Susuga ia Petero, e le'i maua lona tofi Faifeau Samoa, sei atoa le lua tausaga, e tusa ma aiaiga o le Faavae a le Ekalesia Aoa. O le tatalo faamanuia na saunia e le Susuga ia Petero Taufagu. Na faaiu i le taumafataga matagofie ma faaaloaloga masani faa le aganuu, sa saunia e le Ekalesia ma le paia o aiga. O le Afioga i le Tiakono Jessie Misaalefua o ia foi o le Taitaifono a le Ekalesia, sa fai ma sui o le aulotu ma aiga, e momoli faaaloaloga auā le paia o le Matagaluega ma le auvalaaulia, a o le Afioga i le Tiakono Toeaina o le Matagaluega, Falanaipupu Faafetai Taavao na fai ma sui o le Matagaluega ma le au-

valaaulia e momoli le faafetai i le Ekalesia ma aiga mo le taumafataga matagofie, ma le maualuga o fa'aaloaloga faaleaganuu i lea aso. O le tatalo na faaiuina ai le faamoemoe o le aulotu ma lo latou Faifeau, na saunia e le Komiti Faatonu, Rev Elder Makerusa Porotesano FT. Ia manuia lo oulua feagai ai ma lo oulua valaauina i le galuega tausinu. Faafetai.

Saunia e Time Laufilei FS
Failautusi Pulega Tutotonu
Matagaluega AMERIKA.

OSIGA FEAGAIGA
EFKS LEPEA

O le Aso Faraile 30 Aokuso na osi ai le feagaiga a le EFKS Lepea, Pulega Faleata Sasa'e o le Matagaluega FALEATA, ma lo latou faifeau fou susuga Fiso Lakisa ma le faletua ia Felicity. O le susuga i le Toeaina Faatonu ia Misipalauni Faatau FT na ta'ita'i le sauniga ma le osiga feagaiga. O susuga faafeagaiga taulagi o le Pulega na lagolago i isi vaega taua o le sauniga - o Faisiota Autagavaia FS (Alafua) na faitauina le Tusi Paia, o Pati Crichton FS (Aleisa Sisifo) na saunia tatalo, o le lauga mo le faifeau ma le faletua na saunia e Posala Tiotio FS (Lotopa), a o le lauga mo le aulotu na saunia e Apisaloma Taeleipu FS (Aleisa Sasa'e); o le Failautusi o le Pulega ma le Matagaluega Faleata, Amosa Reupena FS (Vaimoso) na saunia le tatalo e faapaia ai le feagaiga osia i luma o le Atua a o molimau le faapotopotoga.

Na faatumulia le malumalu o le Ekalesia i Lepea i le mamalu o le Ekalesia, i susuga Toeaina ma Faletua galulue, o Toeaina ma Faifeau Penisione, o Faafeagaiga Tausinu ma Faifeau Nofoaiga ma Faletua, o A'oa'o ma Tiakono e le gata o le Pulega ma le Matagaluega Faleata, a e faapea foi mai isi itu e fia o le Ekalesia, e oo lava i le aufaigaluega mai Matagaluega i fafo. Na auai foi sui o le Laulau o le Fono Tele, le susuga Failautusi Aoao, ma le susuga Pule Lagolago ma nisi Faiaoga o le Kolisi Faafaifeau Malua, e molimauina lea taeao fou o le galuega i Lepea. E faapea foi i le mamalu o aiganalua, o uo ma paaga a le susuga i le faifeau ma lona faletua, tainane le mamalu o le atunuu lautele.

O i latou na fai ma sui o le Ekalesia Aoao, le Matagaluega ma le Pulega e faafeiloai/faamanuia le faifeau ma le faletua, e aofia ai Faumuina Opapo ma Epati Setefano FS o le Aulotu i Lepea, o Toeaina ia Pouniu Faamausili FT, Aila Patea FT, susuga Polofesa Pule o Piula Rev Mosese Mailo, ma sui o le Matagaluega Faleata ia Amosa Reupena FS, Iosefa Afutiti FS, Kerisimasi Sani FS, Tavita Roma FTP, Tavita Anesone FTP, Matai'a Apisaloma TT. Na folasia foi le le o le Malo (Lauao o Telesa) na saunia e le Ekalesia Lepea e pine faamau ai le feagaiga e tusa ma le aganuu. O le susuga Fiso na ulufale i Malua i le 2015 a e faai'uina 2018, ona toe talii lea i Niu Sila e tautua ai i le EFKS Greenlane, Pulega Maungakiekie Matagaluega AUKILANI. O le susuga i le faifeau o se lupe faalele a aiga ma le afioaga i Lano ma Poutasi Falealili, a o le faletua o se taulaga soifua a le afioaga o Saanapu ma Sapapalii. Ua sui atu i la'ua i le galuega ina ua penisione le susuga Esekia Peneueta FS ma le faletua ia Asofiafia. Na faai'u le sauniga i le Talisuga Paia a le Alii a o le tatalo faamanuia e le susuga ia Fiso. Na taualuga le aso i fa'aaloaloga masani. Ia manuia le galuega.

AUFAILAUGA SULU 2025

Januari	Clay Tofilau FS	Savaia tai
Fepuari	Silipa Silipa FS	Fusi Safotulafai
Mati	Risatisone Taua FS	Saleilua
Aperila	Timoteo Tapelu FS	Faleasiu
Me	Enoka Pouniu FS	Petania fou
Iuni	Onosai Soo FS	Saoluafata
Iulai	Lauititi Vaega FS	Matavai
Aokuso	Ulatifa Leulua'ialii FS	Letogo
Setema	Falaniko Sio FS	Mutiatele
Oketopa	Pita Lokeni FS	Faatoia
Novema	Misiperetiso Ivara FS	MAK
Tesema	Faitoaga Tolua FS	Faatonu Sulu

4. O LE SULU SAMOA AOKUSO 2024

PEPA MAFUTAGA FAAFOUINA AUFAIGALUEGA

O TAOFIGA TAULE A'OA'OINA **(LEARNING THEORY)**

Faatomuaga

E lē fesiligia o se tasi o vaega tutotonu o le soifua faafaifeau, aemaise foi i le galuega faata'ita'i autalavou, faafaia'oga A'oga Aso Sa, a o le avefa foi ma ta'ita'i o mafutaga, o le fai o a'oa'oga kerisiano.

O A'oa'oga FaaKerisiano (Christian Education) e faasino lea i soo se galuega faafaifeau, soo se galuega faaekalesia (e aofia ai lesona, polokalame, faatinoga, lauga, molimau, faasoa, su'esu'ega, apoapoaiga, fautuaga) e a'otauina ai tagata i le vaai faaTusi Paia, ma le faamoemoe ina ia fua mai ai, ma atagia ai i o latou ola, le poloaiga a Keriso e ala i le Tulafono Sili (*"Ia e alofa atu i le Alii lou Atua ma lou loto atoa, ma lou agaga atoa, ma lou manatu atoa, ma lou malosi atoa; ia e alofa atu foi i le lua te tuaoi, ia pei o oe lava ia te oe"*), faapea foi le Mavaega Sili, (*"Ia outou o atu e fai nuu uma lava ma soo..."*).

A faapu'upu'u, o A'oa'oga FaaKerisiano o a'oga e taula i le Tusi Paia, ma le faamoemoe e sui ai le tagata. E faapefea ona tupu suiga na? Ina ua a'oa'oina le tagata. O le autū la o le folasaga i lena aso, o le soifua a'oa'oina o le tagata. O le a tau lōtea ai fesili faapenei: Faapefea ona ou maunoina o loo tupu le a'oa'oina, le talileleia o se mataupu, ma le uluulu matāfolau o se a'oa'oga? Faapefea ona iloa o le a'oa'oina o loo ua maua e tagata, e tutusa ma le ituaiga a'oa'oina sa ou fuafuaina?

E 2 vala autū o le folasaga:

1. O se toe faamanatu o taofiga lautele tau le soifua a'oa'oina (*learning theory*), e pei ona faamauiina i le tala faasolopito;
2. O le fia fa'aataata o se tasi o metotia atonu e aogā i le si'osi'omaga faaekalesia, ua faaigoaina lea o le Tafatolu Faalea'oa'oga, po o le Teacher's Triad.
3. Ona faai'u ai lea o se taumafaiga.

1). Taofiga tau le a'oa'oina (Learning Theory)

I totonu o le 40 tausaga ua mavae, sa tulimata'i ai e le au su'esu'e, pe faapefea ona a'oa'oina le tagata, a o le a foi le auala sili ma faigofie e a'oa'oina ai. Ua mau eseese le au su'esu'e, fua i le latou molimauina o le eseese o le natura ma uiga o tagata. Fai mai nisi e sili ona a'oa'oina le tagata pe a fafau le amio (behavior). Fai mai nisi o le tapu'e o le mafaufau. A e fai mai foi nisi, leai o lagona (emotions) – a lelei le faatonutonu o lagona, o le vave a'oa'oina lena o le tagata.

E tofua la mau nei e 3, ma o latou faapupulaga:

1.1 A'oa'oina e ala i le tapu'e o le amio.

1.1.1. Ivan Pavlon – Faamasani (Classical Conditioning):

Matau e Ivan Pavlon le vave fauā le gutu o le taifau (tulou) pe a vaai i le mea'ai. A e toe maitauina foi e Ivan, e tusa lava pe lē vaai le taifau i le mea'ai, a ua lava lona vaai i le tagata e masani ona alu atu ma le mea'ai, na te faafesoota'ia ai mea e lua. A vaai i le tagata, e expect foi e maua le mea'ai.

Ona maua ai lea o se alafua tāua. O le a'oa'oina o le tagata, o se galuega faatupu lagona (stimulus). E mafai ona faatupu lagona lelei, e mafai foi ona faatupu lagona e lē lelei, auā e fua i le siosiomaga

o le tagata a'oa'oina, ma aafiaga i lona soifua. E le gata i lea a e fua foi i le *delivery* a lē o loo faia le a'oga. O fofoga, le si'ufofoga, o laei, o le fa'aaogā o lima, o lanu, o mea e pa'ō, o itu uma ia e mafai ona avea ma faaoso (*trigger*) i le tagata a'oga, aemaise pe afai ua ia faafesoota'i ni mea se lua – o le *experience* mai le a'oga, ma se *experience* mai se taimi ua tuanai.

1.1.2 B. F. Skinner – Faamasani i le Tulafono (Operant Conditioning): O le su'esu'ega na fa'aaoga ai e Skinner le isumu. A toso e le isumu le 'au o le faitotoa i le taimi e emo ai le mōlī meamata, ona maua lea o lana mea'ai. A e a toso le 'au a o emo le mōlī mūmū, ona sipaka lea. Ona maua lea o le isi alafua – a lelei a le faataatiaga o le tulafono, o le a faigofie ona faatonutonu le amio a le tagata a'oga. E iloa ai le mea e taunuu lelei, e iloa ai foi ona 'alo ese mai le mea e faasala ai.

A ua tele nisi ua lu'ia le taofiga lea o Skinner. Auā afai e apalai faalauaitete lenei taofiga i se faigamalo (ft. a lē usitai le tagata, ona se'ia lea o lana tusi folau, pe ave ese ona fanua ma aseta), o lona uiga e tele le avanoa e ono faasesē ai le tulafono, e apalai ai faiga taufaamata'u, pe fai ai ni faasalaga mamafa nauā. O se faiga amiotonu ea? E taofi lava nisi o le au su'esu'e, e tonu, pe afai e tonu le faamoemoe ma le loto e fai ai. Faapena foi la i le mafutaga faalea'oa'oga - a faamaoni lē o loo faia le a'oga i lana tulafono, o le a talia gofie foi e i latou o e a'oga.

1.1.3 Albert Bandura – Matua i tuu (Social Learning): O le taofi o Bandura e lē tau fa'aa'ogaina le tagata, a e a faalogo a ma mātau i e matutua, o tamā ma tina matutua, o faifeau, o matai, ma faata'ita'i ai, o le a'oa'oina lea, o le afuaga o le soifua manuia.

1.2. A'oa'oina e ala i le tapu'e o le mafaufau.

O le mau lona lua, fai mai e sili le a'oa'oina, pe a uuna'i le tagata e atia'e lona mafaufau. E malamalama ai i le faauigaina o mea, e tupu ai le tofa e fetuutuuna'i ai mea.

1.2.1 Jerome Bruner – Sailiili (Discovery Learning): Fai mai Bruner e a'oa'oina ma malamalama le tagata i ana lava sailiiliga. E seāseā taulotoa e se tagata mea uma o le lesona. Pau a vaega o le lesona e tāua i le tagata, ma aogā mo lona ola atia'e, na o mea na te fia manatua. O lea, mo le faia'oga, e tāua ai metotia eseese, e pei o le faama'ape o se mataupu i diagrams, o bullet point, o oototoga, e pu'e gofie ai se mataupu, atonu e tele ai se mea o le a mafai ona taofi mau.

Mo Bruner, o le natura masani a ia o le tagata o le fia a'oa'oina. E naunau e faamalie le mea o mana'o ai le faifeau, po o le faia'oga, e naunau foi e fia galulue faatasi ma tagata. A o le fautuaga a Bruner, mo ē o faatinoa le a'oga, e faigofie ma fesoasoani pe a tautuana le tulaga o le lelei tapenaina o lesona, o le agamalū, o le tausi o le mamalu, aemaise o le tausia o le filemu i le va o le au a'oga.

1.2.2 Jean Piaget – O le Tagata ma lana Faauigaga (Constructivism): O le amataga o le senituri 20, lea na amata malosai ai le aiaiga faapea e pule le tagata i lona faauigaina o le lalolagi. E fafau a e le tagata le ituaiga a'oa'oina e talafeagai mo ia, e aogā mo lona soifua.

1.3. A'oa'oina e ala i le tapu'e o lagona.

E tai sosolo faapea le mau lona tolu, lea e mafuli i le tapu'e o lagona. Lea e ta'imua ai tagata e pei o Carl Rogers, Abraham Maslow, ma Arthur Combs. Fai mai pau a le mea a le faia'oga e fai o le matau ma le faamalosi'au. E tupu a le malamalama o le tagata, e lē ona o le faatonutonu a le faia'oga, a o le tagata i ana lava filifiliga ma manatu. O le *interpretation* / o le uiga o le soifuaga, o le mea lea e pule ai lava le tagata ia (*meaning is not inherent in the subject matter; rather, the individual gives the subject matter its meaning*).

2. O le Tafatolu Faalea'oa'oga (Teacher's Triad)

O le vaega lona lua o le folasaga, o le Tafatolu Faalea'oa'oga. O nisi e fiafia e saili ma su'esu'e, o nisi e mafuli i le faasoa, o nisi e fiafia i le faatino, a o nisi foi e faigata ona faasufi, e lē augofie. Afai la ua tatou iloa e eseese uma tagata, e ono tele le avanoa e oo ai se mafutaga faalea'oa'oga i se taunuuga e lē paleni. E lē se faafitauli foi e patino na o tagata a'o'oga, a o e foi e faatinoa le a'oga. Afai ua vaetolu ituaiga tagata a'o'oga, e mafai foi ona vaetolu ituaiga faia'oga.

Ua tapenaina e William Yount se meafaigaluega e ta'ua o le Teacher's Triad, lea o loo i ai le siata e pei ona faapipi'i atu ([silasila i le itulau 16 Sulu Samoa](#)), o loo vaai auiliili ai Yount i le vaevaega lea o faia'oga.

2.1. O le faia'oga e mafuli i le atia'e o le mafaufau (1).

O lana metotia, o notes, faamaumauga ma pepa faamatala (4). E faatalanoa ma soalaupule se mataupu, fai fesili. E i ai ana meafaigaluega, o lana outline, o handouts, o le powerpoint. A e fai mai Yount o le faaeteetega po o le risk o le metotia lea, pe afai na ona faataunuu le tolaulauina o notes, e lē taunapa tele po o le ā se tali, o le a se *response* o le au a'o'oga ia te ia, tau lava o le fai o lana galuega. Ona taumamao lea mai le sini o le mafutaga, ua lē maua le tulaga a'oa'oina moomia, e pei ona faailogaina e le numera (7) - lena ua tafea mamao, ua sala ese mai le ogatotonu o le faamoemoe.

2.2 O le faia'oga e mafuli i le atina'e o lagona (2)

O lana metotia, o le tatala o lagona po o le experience o le mafutaga, e naunau foi ina ia mausalī lana sootaga ma le mafutaga, ia latou vaavaai ma manatu ia te ia o se uo mamae (5). E tau lē faalagolago i ni mea faigaluega, e saoloto le vasega e faasoa ma tali, e aunoa ma se popole. O le faaeteetega o le metotia lea, e pei e matele i le fesootaiga mafana, a e lē oo tele se feau. O a foi ni aoaoga o le mataupu, e faata'eta'ealuga le momoliga. Ona faapea foi lea ona lē ausia le tulaga a'oa'oina lelei(8).

2.3 O le faia'oga e mafuli i le atina'e o tomai (3).

O lana metotia, e pei ia o se tufuga po o se matuaofaiva (6), aemaise mo polokalame e mamafa i galuega faatino. E matamata ma matau le au a'o'oga, a e faatino uma e ia. A e a uma ona tuu lea o le avanoa i le au a'o'oga e faata'ita'i, e toe fai ma toe fai seia oo ina maua. O le faaeteetega o le metotia lea, ina nei tau'ave tasi e le faia'oga le galuega, ona alu alu lea fiu, pe ela le taumafai, ona lē taunuu foi lea o le sini o le mafutaga.

E talitonu soo se mafutaga faalea'oa'oga lava e su'ifefiloi, o nisi o tagata mafaufau, o nisi o tagata o lagona, o nisi o tagata faatino. A e afai o le faia'oga o le mafutaga, o se tagata e lili i lagona, mo se faataitaiga, o le mea moni na o e fiafia e faasoa lagona o le a lotu atu i le lesona, a e taotaomia le isi 2/3 o le mafutaga, ona lē maua lea e tagata uma se tulaga a'oa'oina lelei.

A o le faamoemoe o le Tafatolu Faalea'oa'oga, o se metotia e taaofa'i ai itu eseese uma, e taumafai e faapaleni le faatinoga o le galuega. O le faamalosi'au lea a Yount mo faia'oga, ina ia fai ma faamamulu mai totonu o le li'o ua masani ai. A mafai ona atia'e le tomai i li'o uma e 3 – o le mafaufau, o le lagona, ma le faatinoga (*mind, heart and body / knowledge, attitude and approach*) – ona ave lea o ia o se numera 10, e le toe faatafea mamao le faamoemoe, a ua feuia'i lava i totonugalemu o li'o e 3. Ua tapena mo soo se fesagaiga, soo se mataupu, soo se manaoga ua moomia ona tali i lea taimi ma lea taimi, afai o le tomai faalemafaufau o moomia, afai o se galuega faatino i lima, afai o le tofa pulemanava, ua saunia, ma e maualuga le talitonuga, o le a fesoasoani tele lea i le u'una'iina o a'oa'oga faaKerisiano.

Fig. 2.4

POLOKALAME A'OA'OGA
"O LE FAATUATUA"
AUIVI

Faasologa o le Polokalame

Vaega

- | | |
|--|-------------------------|
| 1. Faafeiloai | |
| 2. Faamatalaga tomua | |
| 3. Faasoa: O le uiga o le faatuatua ia te au | Lagona |
| 4. Mea māmā: Name game | Mafaufau |
| 5. Galuega: Pa vaeloto/Impediments to communicn | Amio/Faatinoga/Galuega |
| 6. Faasoa: O se taimi na ou fa'aali ai le faatuatua | Lagona |
| 7. Galuega: Savali o le faatuatua | Amio/Faatinoga /Galuega |
| 8. Mea māmā: Boat to Savaii | Mafaufau |
| 9. Tusi Paia: Salamo 107:23-30: Faatuatua o le Seila | Mafaufau |
| 10. Iloiloga | |
| 11. Faamae'a | |

O le siata i le **Fig. 2.4** o le ata faata'ita'i lena o se polokalame ua faapaleni ai tomai e 3. O se polokalame e faigofie a e effective, e aogā mo soo se vaitausaga, o tagata laiti ma tagata matutua. E i ai faasoa e fetufaa'i ai lagona, e i ai ice breaker po o mea mama, e i ai ma galuega e faagaioi ai le tino, ma faate'i ai le mafaufau. A e taualuga lava i le Upu a le Atua. E galulue faatasi vaega nei e 3, ina ia matuā a'oa'oina ai tagata i le mataupu o le 'FAATUATUA', lea o loo auga i ai le polokalame.

3. Manatu Faai'u.

Ana leai le gagana Eleni, ana leai auala a Roma, e le vave salalau le Tala Lelei. E mafai ona fa'aogā e le Atua mea uma ma soo se mea mo lana galuega. A o se sao taua lea o mataupu faasaenisi, e fesoasoani i le momoliga o le Tala Lelei. Sa tatou vaavaai i taofiga eseese a fomai o le psychology, o le sociology ma isi matātā – e talitonu o nisi ia o sosia ua saunia e le Atua, auā lo tatou faamoemoe. O le faasoa a tagata ua loa tausaga o su'esu'e i le mafaufau, ma le amio faaletagata. O le latou mau, e maualuga le tulaga a'oa'oina o le tagata, e tupu mai ai suiga e pei ona fuafuaina.

E le gata la o le mau lea faasaenisi, a o le mau foi lea o le Tusi Paia. Talitonu e leai lava se faataitaiga sili o le tafatolu faalea'oa'oga, nai lo Iesu Keriso. O lona tulaga faa Perofeta, sa ia a'oa'oina ai le upu moni, e le'i faatusalia lona tomai faalemafaufau. O lona tulaga faa Ositaulaga, sa ootia lona loto ona o tagata, sa la tali foi i o latou mana'o uma, i soo se auala. O lona tulaga faa Tupu, na la fa'aali ma faata'ita'i foliga o le malo o le Lagi, e ala i galuega faamalolo, ma le tutuli o temoni, ma le faamafanafana o loto nutimomoia, ma le fafaga o e fia aai.

E le'i ta mau i se vaega e tasi. O taimi sa le manino ai ona soo, sa ia faamanino. O taimi o mafatiaga sa faamafanafana, o e mama'i sa la faamalolo. O e sa lē mautonu, sa ia faasagatonu. Ia faapea foi ona faasafua le auunaga. Ia saofaga tagata uma i se tatou tautua e itu lasi, o le tautua e lava taoso ma tamaoiga i vaega uma, o le mafaufau, o le loto, ma le faatinoga (knowledge, attitude and approach). Fai lea ma fesoasoani i le faataunuaina o le sini ma le faamoemoe - o tagata ua a'oa'oina, ua suia, ua foliga ia Keriso. Manu teleina le gasologa o le Mafutaga Faafouina o lenei tausaga i le alofa o le Atua.

(silasila i le itulau 16 mo le ata: The Teacher's Triad)

Saunia susuga Tafatolu Tapaleao FS,
Faifeau Faia'oga, Kolisi Faafaifeau Malua.

O LE PEROFETA MULIMULI

(O le tala faafagogo ua faaSamoaaina mai le tusi, 'The Last Oracle', tusia e James Rollins)

O le te'a atu o le avanoa itiiti, na oo atu ai i se ālavai vaapiapi e fepi'opi'oa'i pei se gata i luma atu, o laina ai laau faamalumu a e punipuni e tafega o laulaau. Na faatopetope atu le vaa. O faasusulu atu le sulu i itu uma, na tuia ai le pogisa. Na tago ifo le fitafita fanafana i lalo ma piki atu i luga se atigi fagu una.

E i ai se tagata na ui atu iinei.

Na tālo atu Porisakova i le pailate ia faasaosaoa atu le vaa, i lona lagona e lē o mamao ese i latou o sailia. O le alavaa o muamua atu na ui atu i galugalu lemu. Na mulimuli mālie atu ai le vaa, na seuseu i le itu taumatau ma le agavale.

Na suluia e le sulu nisi otaota tafea e tele i le vai, o lapisi ma nisi faguvai e tele. Ua tele nauā. E i ai se mea na sesē iinei. O i latou o sailia sa le'i valea ma faatamala e oo mai nei. Na masalosalo Porisakova ma na ia oomi le tau'au o le pailate. Na geno atu i ai e faalemū le vaa.

Na lagona atu e Monike ua faaitiitia le ū o le afi o le vaa.

A o latou punonou ma tamaiti, na ia vaaia le vaalele sami o alu ane i o latou luma, ma taamilo i le pi'oga mulimuli o le alavai, ma ua faatelegese, ua lēmū tele.

E lē lelei.

Na 'emo atu le sulu, faasolo atu i luga o le vai ma faasasa'o atu ia i latou. O le a maua i latou i le isi sekone. Na pau lo latou faamoemoe o le –

Mai le pogisa o le vaomatua i le itu agavale, na oso faafuase'i mai ai se ataata o se manu lapo'a ma oso sa'o i luga atu o le vaalele sami. Na lele maualuga, na ova atu ma pe'ape'a o le vaa, peitai mai ona vae sa uumau ana moto, na ia faatoulu ifo ai ni luuga o mea pogisa ma tau'ai ifo i le vaa.

Na latou taia le ili sau'ai pei ni pomu kesi.

O pulu'ō'ō o fana mai le faleo'o.

Na lagona atu e Monike le taia o pe'ape'a i lo latou to'ulu ifo. Na tipia e pe'ape'a affi una, e ui ina sa le'i fe'emo ni aloiafi, a e na pā pā salalau lava aga'i i fafo ma le ma'ini o fana manulele.

Na fe'ei ma feoi, na afa i le te'i afa i le tiga, a o taia ma lavevea le auvaa i le salalau o pulu. O le pailate sa i lona nofoa maualuga, na 'alo i lalo ma faapa'ū ifo i lona fefe. Na ia taia le laau o le

'ave o le vaa ma toe ola ai le vaa. Na oso faafuase'i i luma le vaa pei se rapiti lavea, ma tau mafuli i lona liliu. Na tauivi le pailate e tau faatonutonu le 'au o le ave. Na susulu malama le sulu i le alavaa ma susulu i o latou luga, na suluia atu ai i latou i lona malamalama. Na iloa atu e Monike le sui pailate o faataiō ma faasino atu i latou.

Ua fai si ou tuai, uso.

O fitafita e toalua sa i luma na faafuase'i ona felele i tua. Na taia atu ai ma isi. O lo latou lavelavea ma milo faatasi, na latou taia ai i le puipui uamea i tua o le vaa. Na osotū i luga le vaalele i le ea, ma taavalevale pei se paelo.

Na lagona atu e Monike le fe'ei o le tiga ma le leo o pe'ape'a o loo nunuti. Na pipisi ma salalau solo le toto ma ponaivi mai tua o le ili pei ni asu sau mai ala'ea o vaalele – ona pa'ū ifo lea o le vaa ma taia i le vai ua sa'e ma fulifao i luga, patatū malosi a o sau le manogi ma le asu o le kiso o le afi ma lona leo ua mate ifo. Na susulu a'e pea le sulu mai lalo o le vai.

Na liliu ese Monike. Talu ai nei, faatasi ma le fesoasoani o tamaiti, na ia lalaga ai le seloloi fagota mai le faleo'o e fau ai se maea mafiafia pei o lona limatusi – ona ia nonoa faalava lea i le alavai. O le maea lena na taupe ai le auvaa ma lāvea ai le vaa.

Mai totonu o laau i luga atu o le vaalaa, na oso ifo ai Marata ma tu tonu i luga o laau. Na vave lava ona opo Piota i ona lima. Na ia nofo i luga o ona vae, o au selasela ma tau mānava. A o loo ia opo pea Piota. A o ona mata, sa taula'i ia Monike, na iila pei se tioata i le masina.

Na ia manaomia le vaalele sami ia lele i luga o le alavai, na taiala e le alavaa a i latou na sailia. O le oso a Marata na fuafua na o se taitaieseina mai o le vaa ia 'aua nei latou iloa le maea o nonoa faalava i le vai. Na ia faia lona tiute ma le atoatoa. Na piimau atu Piota ia Marata. Ina ua uma ona faamatala le fuafuaga talu ai, sa nonofo le tama ma le manuki ma ia tuu atu i ai pulufana. Na ia tautala lemu atu i le faa Rusia, peitai na iite Monike i le malamalamaaga moni sa i le va o le toalua lea, e tupu a'e mai se lagona e loloto atu. I le faaiuga, na ia aveai ai pulufana i ona tama'ivae

ma oso atu i luga o laau, ma nimo atu ai.
Na uli malie atu e Monike le vaalaau i le isi alavai. O iinei na faatafea atu ai le vaa i luma i le malosi o le tafe. Agai i le matafaga o i luma mamao. E ui ina mapuea Monike ua sao lana mailei, a e sa ia mautinoa o loo latou aga'i atu i nisi tulaga e sili atu ona mata'utia.

A e leai se isi mea na te mafai.

E faitau miliona ola o loo lamatia.

O le a lava, na iloilo e Monike Marata ma tamaiti e toatolu. Ia te ia, i le leai o sona manatua o se isi olaga, o i latou nei o lona lalolagi. Na o le pau lea o le mea e taua ia te ia. Na te faia foi soo se mea e puipui ai i latou.

A o ia faafoe atu lo latou vaa i luma, na ia manatua le matuitui o le toe to manatu i le faleoo a o ia tautulemoe ai.

I le tofo o kinamoni, o laugutu vaivai...

O le a le olaga na gaoia mai ia te ia?

A e pe mata e toe maua mai?

12.04 taeao

Uosigitone

O se taimi itiiti ua te'a le tulua o po ma ao, na tuu ese ai e Kati le telefoni ma tula'i mai le laulau. Na ia tepa atu i le faamalama i totonu o le potu o le falema'i. Ua uma lana valaau faafonotaga ma Faatonu Koloue ma Seana Makenaiti. O le toalua lea sa i le ofisa o Penita, na feagai ma le taua faamatagaluega mai lo laua pa'usisi. O tamaloloa e toalua sa fetiaia'i ma le tauiviga poo ai e sili le paoa i vaega eseese o le vaega'au.

O luga uma o le taunuuga e oo i ai le teine.

O Kati, i lona atamai ma le poto masani mai lana matafaioi, na ia ofoina atu fautuaga sa ia iloa, a e leai se isi mea na te mafaia. Ua lafo atu ia i la'ua e saili se auala e faafetaia'i ai Ioane Mapeletope. Na iloa e Kati le auala na te faia ai le mea aupito lelei.

Na ia savali atu i le faitotoa e ui atu ai i le potu o le falema'i. Sa leoleoina e se leoleo fa'aauppegaina. Na ia tu faatali ai i autafa o le faamalama e tioata pito tasi, ma faatau pupula atu i totonu o le potu.

O luga o le moega, sa siomia ai e aluga le teine o Sasa sa nofo ma se tusi valivali ata i luga o ona vae ma se pusa o penivali lanu. Sa feagai o ia ma se ata na galue ai i se itulau, o ona foliga sa mataalia a e sa filemu. Na faafuase'i ona pupula

a'e Sasa i luga ma autilo sa'o atu ia Kati. O le tioata e mafai na iloa atu i le itu e tasi; e leai se auala e mafai ai ona iloa mai e le teine o loo tu atu Kati i fafo. Peitai sa le'i mafai e Kati ona lūlū ese lona lagona, sa vaai atu le teine ia te ia, na ia iloa atu o ia.

I le tasi itu, sa nofo ai Iuri i le nofoa. Na ia aumaia Sasa mai le gutu o le tuugamau, na faamaonia ai lona ma'ema'eā. Na ia lagona le fiafia e pei o Kati i le toe malosi o le teine. Ua malie lona loto a ua vaivai lava, na ia nofo ai faapalupē i lona nofoa, o lona auvae o i luga o lona fatafata, o tautulemoe teisi.

Na liliu Kati ma lue atu i le leoleo. Ua uma ona ia tatala le faitotoa ma faavātele mo le tamaitai. Na ia savali atu i totonu o le potu. O loo nofo pea Makepalai i le nofoa e tasi. Sa na ona ia alu ese lava mo le faia o lana telefoni ma lona alu i le fale lē tāua, e leoleoina i taimi uma.

I le isi itu o le moega mai ia Iuri, na tutu ai Lisa ma Malakoma, e tofu ma afisiga pepa i o la'ua lima. Na faatusatusa a la'ua faamatalaga tusitusia ma fuainumera, ina ia tau fai tutusa.

Na ataata atu Lisa ia te ia a o ia faatasi atu. "O loo sologa manuia lona toe malosi mai. Ou te mafai ona faaalu ni tausaga tau lava ina iloilo ma su'esu'e le faatonuga o togafitiga."

"A e ua na o se taofiga," na fai atu ai Kati ma lue atu lona ulu ia Iuri. "E lē o se togafitiga."

Na toe liua faanoanoa foliga o Lisa ma liliu atu i le teine. "E sa'o."

Na logoina e Iuri le gasologa o togafitiga mo Sasa. O ona tui faaopoopo ua faapuupuu ai le umi o lona ola. E pei o se afi ua tutu i se moliga'o, o le a mu ai i totonu o lona tino, ma tafiese o ia e avea ma meanoa. O le tele o le taleni, o le atili vevela foi lena o le mumū o le afi.

Na fesili Kati pe fia le umi o loo manatu Iuri e ola ai le teine. O le tali na maua mai sa maalili vaoa ai o ia. E tusa ma le tulaga o i ai lana taleni, a umi lava o le isi fa i le lima tausaga.

Na matuai fuli Kati i lenei faamatalaga. I le itu faafeagai, na peiseai ua mapu Makepalai, na faailoa lona folafola o le atamai o Amerika o le a mafai ona faaluaina ai le umi o lona ola, a e o lona uiga o le a lē aulia lava e Sasa lona asofanau o le luasefulu tausaga.

Na fa'aauau pea Lisa, "Na pau le faamoemoe mo ia, o le aveese o totoga faapipii. O le a ia leiloa lona atamai, a e o le a ola o ia."

Na tautala mai Makepalai mai o latou tua. “Atonu e ola, a e i le a lona tulaga? O togafitiga ma totoga faaopoopo, e ese mai le faamaualugaina o ana taleni ma agavaa, a e faaitiitia ai foi faailoga o le afaina o lona mafaufau ma le amio. Aveese mea faaopoopo, ona outou maua lea o se tamaitiiti ua motusia ese ma le lalolagi.”

“E sili atu lona nai lo le i ai i totonu o le tuugamau,” na fai atu ai Kati.

“E sa’o lona mea?” na lu’i atu ai Kati e Makepalai.

“O ai oe e te faamasino ai? O le maua o togafitiga ma totoga faaopoopo, na te maua ai se olaga atoa, e tusa lava pe puupuu. E toatele tamaiti e fananau mai ma fetai’i loa ma mala mai le amataga, faasala i le olaga atoa i tulaga o latou soifua lē maloloina. Lukimiā, Faama’i oti o le AIDS, tino lē atoatoa. E lē tataua ona tatou saili e avatu i ai se ituaiga soifuaga e sili ona lelei, nai lo le umi o aso e ola ai?”

Na otegia atu e Kati. “Na o lou mana’o lava e fa’aaoga o ia.”

“O anafea na avea ai le mana’o o se toatasi o se mea leaga?”

Na liliu atu e Kati lona tua i le tamaloa, i lona ita ma inoino i ana finauga e faamaonia ai lona mana’o. O ni manaoga faamanu. E faapefea ona ia faasagatonuina se mea e tasi o nei mea? Aemaise o loo aafia ai le ola o se tamaitiiti.

Na fai pea galuega a Sasa i lana tusi ata valivali. Na ia tusi i se penivali lanu meamata. Na minoi solo lona lima faatopetope i luga o le lautusi, faatumu atu lea pito ma le isi, e soona faasolo tuu tuu loloa.

“E tataua ona ia tusi ata?” na fesili ai Kati.

Na feminoia’i Iuri, ua ala i le talanoa a le tamaitai. “O nisi faasafua e manaia i le mae’a ai o se fetufaaiga,” na ia tomumu ai, a o tau faalelei lona fa’a’i. “E pei o le tatalaina o se pamu tumu i kasa omia. Pe afai e lē faaolaina toatasi mea faaopoopo, e faaosofia ai o ia, o nei galuega fai mālū o le a faanofofilemuina o ia faalemafaufau.”

“Ia, o loo foliga fiafia o ia,” na tautino ai Kati.

A o fai ana galuega valivali, na toamalie foliga o Sasa faatasi ma si ana ataata mālīe pei se aitu. Na ia tu faasa’o ma tuu atu lona lima itiiti ia Kati. Na ia tautala atu i le faaRusia ma ‘eu atu le lima o lona ofu i lona lima itiiti.

Na pupula atu Kati ia Iuri.

Na ofo atu e le alii se ataata foliga lēlavā. “Fai mai e tataua foi ona e fiafia oe.”

Na tulei atu e Sasa lana api agai ia Kati, e pei o loo ia mana’o e auai atu Kati i le valivaliga o ana ata. Na faagoto ifo Kati i se nofoa ma na talia le api. Na ia faasenunui ina ua ia vaaia atu e le’i faasoso’oina e le teine ia laina, a e na galue i se itulau avanoa. I se atamai maoa’e le manino, na ia tusia ai se ata o se vaaiga. O se tamaloa o loo ia aloina se vaalaau aga’i i se vaomatua pogisa, faatasi ai ma ni faailoga o isi tagata o loo nonofo i ona tua.

Na amata ona gatete lima o Kati. Na ia iloa atu le tamaloa o loo aloina le vaa. Na ia taumafai ia malamalama. E foliga mai pei o Monike. Peita’i na te le manatua se taimi na alo ai e Monike se vaalaau. Aiseā na tusia ai e le teine lea ituaiga ata?

Na pei e maitauina e Sasa le lē fiafia o Kati. O lana ataata na liua i le atuatuvaale. O ona laugutu sa gatete, e pei ua fefe e i ai se mea sesē ua na faia. Na ia faatau pupula atu mai ia Iuri faasolo atu ia Kati. Na iloa atu le maligi o loimata. Na ia memumemu faaRusia, e faamaulalo ma le fefe.

Na tulei atu le nofoa o Iuri faalatalata i ai ma le leo mālū o le tua’ā o le tamā. Na sui faamalosī e Kati ona foliga – mo le tau faanofō lelei ai o le teine. A e sa tātā tetele pea lona fatu. Na ia manatua o Iuri sa faamalō ina ua ia vaai i ata muamua a le teine. I lona taimi, mo sina sekone itiiti, na ia manatu ai sa maitauina e le tamaloa le foliga sa tusia i le pepa, peitai o se mea mata’utia e lē tataua ona tupu.

Na tula’i ese Makepalai mai lona nofoa ma savali atu agai i le moega, ua manino lona masalosalo. Sa le’i amanaia o ia e Kati. E leai sana pisinisi i lona mea. Petai sa faasaga sa’o ma tumau lana pupula ia Iuri. Na fetau lana pupula ma le faatau pupula a le tamaloa i luga a’e o le ulu o Sasa. E pei o le teineitiiti, sa faapea foi lana pupula e faamaulalo pei e faatoese.

Aisea o le a –

Na faate’ia le pa mai o se pomu ma galulu atoa ai le nofoaga, na sau mai luga lagonaina atu i lalo. Na tatagi solo logo faailoilo. O mata uma na autilo i luga i le tualuga, a o Kati na ia oso a’e i luga. Sa fai sina tuai itiiti.

O Makepalai na ia oso atu ma taofi mai Fomai Lisa Kumini i fili o lona lauulu enaena Farani. Na ia tulei atu o ia ia te ia a o ia solomuli agai i

le puipui o le potu. Na aapa atu Kati ia te ia a e na misi. Na faasee atu le tamaloa i tua i le tulimanu, ua le iloa atu o ia punitia mai le vaai mai le faitotoa ma le faamalama.

O le isi ona lima na ia to ane ai lana telefoni mai lona peleue. Na ia oomi le ki i lona itu, ma matala ai le itu i luga i ona tamatamailima, faailoa ai se amoti o se fana itiiti. Na ia oomi malosī atu i le fa'a'āi o Lisa, ma faasaga i luga i lona ulu.

“Aua e te minoi,” na ia musumusu atu ai i lona taliga.

O fana telefoni feavea'i na fai ma sasa i vaega o puipuiga faasikulakī. Peitai o le meatau na avatu e Mapeletope ia te ia o se faatufugaga e leai se faalētonu itiiti. E mafai foi ona fai ai ana telefoni. Na sao atu mai siaki ma fā'ata a sikulakī e aunoa ma se tau faalētonu. Sa utu i pulufana o le malosī .22, a e peitai sa i ai le tapulaa i le auupega.

“E lima a'u pulu o loo i ai!” na ia valaau leo tele atu ai i le potu ua faate'ia. “O le a ou fasiotia muamua le fomai – ona soso'o lea ma le teineitiiti.”

Na faasaga atu le fana a se tasi leoleo ia te ia, peitai na lafi Makepalai i tua o Lisa sa fai mana talitā.

“Taatia ese lau fana!” na ia valaau atu ai i le leoleo.

Na tu pea le leoleo i lona tulaga, e le'i minoi lana fana.

“E leai se mea o le a oti ai fua se tasi!” na fai atu ai Makepalai. Na lue atu lona ulu faasaga i luga. “Na o lo matou manao lava i le tamaitiiti. O le mea lea ia tuu ese tou fana!”

Na tu sa'o i luga Kati mai le mea na punou ai. Na toe itiiti lava ana ia amotia le tamaloa. E ao ona vaavaaia lelei o ia. A e na ia vaavaai lelei atu foi i ai, maitau toto'a pei se tusi. Ui i lea, na geno atu le fafine i le leoleo ina ia tuu ifo i lalo lana fana. “Taatia i lalo ma kiki mai iinei!” na faatonu atu ai Makepalai.

O le isi luelue mai a Kati, na faapa'ū ifo ai i lalo le tamai fana i ona tamatama'ivae.

E faigofie le misiona a Makepalai: ia malu puipuia le tamaitiiti seia taunuu mai Mapeletope ma lana au.

“Pau le tatou mea e fai o le faatali!” na ia fai atu ai. “Aua le minoi faafuase'i; 'aua le fia toa.”

Ina ua pa le pomu ma lagonaina i totonu o le fale, na otometi lava le faasaga o Penita i le televise i

lona itu agavale. O loo faaalua mai ai mea o tutupu tonu i le taimi lea i le potu o Sasa.

Na tula'i masau a'e Penita i luga. O lona fatu ua tātā vale, o lana vaai ua tau nenefu i le ita. Na ia ki i luga le leo o le televise i lona autago tauaso i ona ki.

“Aua le minoi faafuase'i; 'aua le fia toa.”

Na tu a'e i luga Seana mai le isi itu o le laulau. Na la'ua lagona atu le leo o pulufana. Na tago atu Penita i le ata o le vaega aupito maualuga o le Sikima ma fa'aali i le tv i tua o lana kesi. Na aveese lana vaai ia Lisa a e autilo atu i le isi tv. Na faatumulia le auala i le asu. O tagata na pulou ma laei i ofu tali pulufana ma latou talipupuni foliga na tamomo'e atu ma latou fana i luga o latou tauau.

“Ou te lē talitonu i le faalētonuga leaga o lenei tamaloa,” o Seana lea.

E le'i taumateina po o ai lea sa faasino i ai lana tala.

O Mapeletope.

“O loo latou o mai mo le teineitiiti,” na gugulu atu ai Seana.

Na lagona atu le leotele mai o se sipika feavea'i mai le vaega aupito maualuga o le Sikima. “TAGATA UMA I LALO O LE FOLA! SOO SE TAGATA E TETEE O LE A FETAUI MA LE OTI!”

Na kolosi atu Seana ia Penita. “E le'i faatagaina lenei mea. E le'i aumaia se faatonuga tatou te solomuli ai muamua. Ua matua'i amio leaga lava lenei tamaloa.” Na faasaga atu Seana ia te ia. “Ua e iloa le mea e tatau ona fai.”

Na liliu atu le vaai a Penita ia Lisa. Na iloa atu le auupega o oomi malosī i lalo o lona auvae, o le ua molemole na ia sogi i ai i taeao uma. Peitai na ia lue lēmū. Sa i ai se tulaga o le toilalo-saogalemu pe afai e osofaia Sikima e se fili mai fafo.

A e tatau ona aveese muamua ona tagata mai le lamatia o i ai. O le taua lenei e i le va o Penita ma Mapeletope. Na ia tago atu i le telefoni. “Paraneti.”

“Lau afioga o a'u lea!” Na maai mai le leo o lana lagolago ua sauni.

“Faaleo le Faatonuga Alefa.”

“Ua lelei lau afioga.”

Na malele mai le isi faatonuga fou i luga o le ea, na faatonuina ai tagata uma ina ia vave tuumuli ese atu i fafo. Sa mana'o Mapeletope ina ia

avanoa le auala mo le tamaitiiti. Ina ia saogalemu ona tagata, ua manatu ai Penita o le a ia faia tonu le mea lena.

Na savali atu Seana i le faitotoa. “O le a ou alu i luga. Ou te taumafai e faatalanoa e fetuutuuna’i, a e afai e lē manuia...”

“Ua ou malamalama.” Na lilo atu Penita, toso le toloa o lana laulau, ma aumai se tamai fana. “Ave le fana lea.”

Na lūlū le ulu o Seana. “E lē mafai e pulufana ona aveese tatou mai le mea lenei.”

Na alu ese lana uo. Na uu mau e Penita le fana ma autilo i le tv. E i ai lona tiute mulimuli e fai mo le Sikima. Na ia faasaga atu i lana laau komepiuta ma ta i totonu le faatonuga o le toilao-saogalemu, ma oomi lona lima matua i le faitau tamatamailima.

Na aliali mai se sikuea lanu mūmū, o loo faafofola i lanu moana o masini ea malulu o le fale. O le faitauga o le taimi tau i le faaletonu sa seti i le sefululima minute. Na faaluaina e Penita le taimi ma faavasaga tutusa ma lana uati ina ia ola tonu i le 0100. Na ia faatau pupula i le va o le faitotoa ma le tv i le puipui. E tele le gaoiga e fia fai ma faataunuu i totonu o se taimi puupuu. Ui i lea...

Na ia ta i luga o le laau faatonuga mulimuli e faaola ma amata ai le faitauga. Na amata ona faasolo ifo i lalo le faitauga.

Ma lana fana i lona lima, na ia tamo’e atu ai loa i le faitotoa.

(soso’o atu Sulu Samoa Setema 2024)

FEAU O LE ASO TAMĀ 2024

LAVA MO TAGATA UMA.

“4 Po ua faatauvaavaa ea ia te oe le faula’i o lona agamalū, ma lona faapalepale, ma lona onosa’i, o loo e lē iloa e ta’ita’iina oe e le agamalū o le Atua i le salamō?” Roma 2.

E te manatua le fafine na tata’e lana fagu alapasa o uu manogi ma u’u ai aao o le Alii o Iesu? Fai mai Luka, “39 Ua iloa e le faresaio na fai atu ia te ia, ona faapea ifo ai lea i lona loto, “Ana se perofeta lenei, po ua iloa e ia lenei fafine, ma lana amio, ua ia pa’i atu ia te ia; auā o le fafine agasala ia.”

Ua ta’u mai iinei, le isi ituaiga vaai e masani ai le tama, i le tiute ma le faatinoga e fai e tina; e

vaai faatauvaavaa, e faitio ma faaleaga. A o se a’oa’oga foi lea i le eseese o le vaai a le tagata i le isi ona uso a tagata, e tuu faafeagai ma le silasila i ai a Iesu: o lotu ma tapuaiga na faia e le tagata na latou faasala i le fafine ona o lona olaga leaga o le tuana’i, peitai o Iesu na ia faamamā ia te ia ma toe faia ia fou ma lelei atoatoa. “47 O lea foi ou te fai atu ai ia te oe, “Ua faamagaloina ana agasala e tele, auā ua alofa tele mai o ia; a o le ua faamagaloina i ai se mea itiiti, ua itiiti foi lona alofa.” Na silafia e Iesu le amio a lenei fafine sa fai, a e na la silafia foi le ituaiga tagata o le a avea ai o ia, pe afai e pa’i atu i ai lona agalelei.

O le tele o lo tatou iloa ua faamagaloina le tele o tatou agasala (o a tatou agasala uma), o le tele foi lena o lo tatou alolofa i lo tatou Alii. O le faamagaloga a le Atua e lē i’u atu i se soifuaga agasala pea; a e ta’ita’iina ma faasolo atu ai i se olaga e viia ai le Alii o Iesu. ‘e taitaiina oe e le agamalu o le Atua i le salamō.’ O le salamō, o lona uiga o le toe liliu faasaga ese ma fai le mea e tuufaafegagai ma le leaga sa fai muamua. O le faasala na te lē aumai se olaga amiotonu, a o le iloa o le agalelei ma le alofa tunoa o le Atua ia i tatou, o lena e maua ai le olaga manuia ma filemu. Sa manatu Simona le faresaio o le taliaina o ia e le Atua, sa faavae mai i lana amio ma ana faatinoga; o le ala lena o lona ola faapito ma lona sa’o ia te ia lava. Peita’i le agalelei o Iesu na la faasa’o ai ia te ia, ‘a o le ua faamagaloina i ai se mea itiiti, ua itiiti foi lona alofa.’ Pe afai e te manino ma malamalama lelei i le faula’i, ma le faafia ona alofa mai o le Atua ia te oe ma faamagaloi mai, o le a faapea foi ona e alofa atoatoa ia te Ia, ma naunau e faafiafia lona finagalo i mea uma e te faia.

Mata o se feau lelei foi lea toe faamanatu mai mo i tatou Simona uma, i le faamamaluina o le Aso Sa Tama i lenei masina. Ina soia tatou te vaai maulalo ma fai manatu i le sao taua o tina ma isi uso. A ia mafaufau ifo le tama ia ia te ia pe faapefea lona va ma le Alii, ma faitau pe mafai, le faulai o le agalelei mai o le Atua ua la faamagaloi soo ai i tatou mai a tatou agasala faia pea, aemaise i lo tatou va feagai ai ma tina ma le fanau i totonu aiga. I le ma lenei, ‘aua tatou te toe faalavelave i fafine ma tina, i o latou tiute faafagu alapasa, o loo faamanogi ai le galuega a Iesu. Ia manuia le Aso Sa Tama 2024. **F. Tolu (F. Sulu)**

O E UA FAI I LAGI LE FOLAUGA

FEAGAIMAALII FAAVALE

IOSEFASALA

26/7/1970 – 1/6/2024 (53+10+7)

O le tiakono a le EFKS AGAPE i Garden Grove Kalefonia i Amerika. Na soifua mai i lona aiga i Fagasa Amerika Samoa, i le Aso Sa 26 Iulai 1970, i ona tuaā o Sala Samiu ma Talila To. A e na faamanavaina ana galuega i le lalolagi nei, i le Aso Toonai 1 o Iuni 2024. Ua 53 tausaga, 10 masina ma aso e 7 lona soifua. Na faaiipoipo atu ia Faafetai (Taitai) Aitolu o Fagale'a Fagasa Amerika Samoa, i le Aso Lua 26 o Novema 1996. E to'atolu o la alo, o tamaitai uma, o Marissa, Mariah ma Marlaena. O se gasegase oso faafuase'i, na uma atu ai lona soifua, a o sauni e tapena le feiloaiga ma le au usufono a le matou aulotu, i le aso lava lea, Iuni 01, 2024, ina ua toe talii mai le Fonotele i Malua. O se tala e talia gatā tele, e lē gata o si ona faletua ma si fanau ma aiga, a e faapea foi ia te a'u nei ma le Ekalesia. Auā na faitonu i le taeao, a e alu faafuase'i lana malaga i le 9:30am i le taeao lava lea. Ou te talitonu, ua tataua lava ma onomea ia te ia upu o le Talalelei, "*Amuia lea auaua, e maua mai e lona matai, o loo faapea ona ia fai*".

Na faapa'iaina lo la tofi tiakono i Fagasa i le 2010, e le faifeau o Sani Tea FS. O le 2016, na malaga mai ai i Kalefonia Amerika i nisi o faalavelave a lona aiga, ona manatu ai lea o le a siitia mai lona aiga, e faauma ai a'oga a si fanau, ma saili ai se lumana'i. Na faaogaina lo la tofi tiakono ma galulue ai faa-matafale a lenei aulotu, i le 2018 e oo mai lava i le aso nei. Sa avea ma Komiti o le Taulaga, Komiti o le Sene, e maliu nei, o loo avea ma Komiti o le Alofa o le Faifeau ma faamaopopo le agalelei mo tofi lauga a le aulotu. O ia o le Tiakono Ta'ita'i a lenei Pulega. E auai ma faamaopopo i vaega o le Ekalesia. Le mafutaga a Tiakono, o le Aufaipese, e ui lava ina le lelei lona siufofoga, a o si ona faletua o le ta'ita'ipese. E tele agavaa ma meaalofa na faasoa i ai e le Atua. E lelei i le aganuu feagai ma le atunuu, e tausia le va i fafo, ma le va tootoo o faleupolu. E momoliina se tofa a lenei aulotu faapea foi le Pulega, i mea tau le aganuu ma le faa-Samoa. E faatuatua ina i ona faiva, e faamaoni i lona valaauina. E malosi lona leo, e una'i mai

lana fanau i mea fai a le Ekalesia. E ausage lenei aulotu i fanau tama, a o nai ona alo ma alo teine o le aulotu, o taulele'a ia o si o matou nuu. E tausia feagaiga, e lē gata o ma'ua nei, a e faapea foi i le aufaigaluega a le Pulega ma le Matagaluega. Ua matuā misia lava e si a matou aulotu, auā o le tagata e faafiafia i tagata. E fai tala malie, e taufaalili foi i isi taimi.

O le alofagia o lenei uso, sa vaaia lea i le aso o ona toe sauniga. Na faia lava i le malumalu o le EFKS AGAPE i Garden Grove i le aso 2 o Aokuso 2024. Na muamua ona sauniga faale-aiga, i le 8am-10:30am, na ta'ita'i lava e le lupe faalele a aiga, o le Sui Peresetene o le Kolisi Faafai-feau i Kanana Fou, o Rev Dr Simi Mauga. Sosoo atu ai ma alofa'aga e ala i faitau a le Mafutaga Tina a le aulotu ma le Pulega i Saute.

O le itula e 11:00 i le taeao, na faia ai ona toe sauniga mulimuli. Na taitaiina lava e le Pulega i Saute. Sa ta'ita'i le susuga i le Toeaina o le Pulega, o le Komiti Faatonu foi o le Matagaluega, na ou molimoliina lona sa i totonu, ma faia lona molimau faale-agaga. Na faitauina le Tusi Pa'ia e Time Laufili FS. O le tatalo na saunia e le susuga Tupe Auelua FS, o le failautusi foi o le Pulega. A o le Upu Faamafanafana na saunia e le susuga a Hector Pouono FS, o le teutupe foi lea a le Pulega. Sa faamamafaina lava e le Failauga le manatu autu o lea aso, Opetai 1:1-9, ***Tumau pea ona fefiloi***. Gasologa o le soifuaga e faafesagai lava itu e lua, o le lelei ma le leaga, fiafia ma le faanoanoa, 'ata ma le tagi, o le ola foi ma le oti. A o le mea ua mautinoa, e tumau pea le faamaoni ma le alofa ma le faapalepale o le Atua. Faaopopo foi le Ta'ita'i, i le tāua o le ogatotonu o le Satauro o Keriso i le soifua ma le ola. Auā e selesele ai ma le fiafia manuia o le faaolataga. Sa ou ta'ita'ia lona sauniga i le tuugamau i le fanua maliu o Westminster Memorial. Ma matou faamavae atu ai i le uso i le Pese 268. **Talofa uso e, tofaina oe, Ua sau le itu po e malolo, E ala oe pe a mavae le po, Tofa, Tofa, Tofa.**

"A o lo tatou nuu moni ua i le lagi lea, o loo faatalitali mai ai i tatou i le Faaola, o le Alii o Iesu Keriso." O Feagaimaalii Sala, o le tagata lava o le lagi. Manuia le malaga, lau afioga i le tiakono, tatou te toe feiloa'i.

Saunia: Susuga Filo Taua'ivale FS,

EFKS AGAPE Garden Grove,

Matagaluega AMERIKA.

PAEA SOLOFUTI ALO

10/6/1934 – 25/7/2024 (90+1+16)

“28 E tula’i mai lana fanau, ma faafetai ia te ia; o lana tane foi ua vivii ia te ia. 29 E toatele fafine e amio lelei i latou; a o oe, ua faasilisili oe ia i latou uma.” Faata. 31.

O upu ia a le Poto o Solomona ua filifilia e si ana fanau, e fai ma auga tausili o se auiliiliga o le talaaga o le soifua faatinā o si o latou tinā, o lē sa pele ma mamaē i o latou loto ma mafaufau. E afua mai lava i lona soifua mativa, tigaina, pologa ma le faapuapugaina seia oo ina faaeaina ma faamanuiaina. O upu ia sa faamatalaina ai e lana fanau, le ola galue, atina a’e ma le nafatausi sa feagai ma lo latou tina i le faatinoga o le fatuaiga tausi a lo latou aiga ua avea ma ala ua latou mauaina ai faamanuiaga e tele a le Atua, ua latou molimauina ma ‘ae’aeina i lenei vaitaimi.

Sa fanau o ia i Manase i le Aso Sa, 10 Iuni 1934, mai ona matua o Savea Sione lona tamā, a o Aiaraisa le tina. Na maliu o ia i le Aso Tofi, 25 Iulai 2024, ua atoa ai le 90 tausaga, 1 le masina ma aso e 16 o lona soifua. Sa faaipoipo ia Solofuti Faamoetauloa Suena Alo o Satoalepai; ma o le nuu lava lea ma le aiga o lana nofogatane sa atina’eina ai si a la fanau ma lona aiga. Sa faaipoipo i le Aso Lua, aso 10 Ianuari 1978, faaekalesia ia Fepuari 1978, a e faatiakonoina i le aso 20 Aperila 1978. E toaiva (9) si a la’ua fanau, e tolu (3) tamaitai a e toaono (6) alii, ua maliliu le toalua (2) o alii, totoe mai ai le toafitu (7). O le toalua o ona alo tamaitai ua faaipoipo atu i Faifeau Samoa o le EFKS, a e toatasi lona alo tama ua avea ma faifeau o le Faapotopotoga a le Atua (Assembly of God). E toaluasefulu ma le toafa (24) fanau a lana fanau, ma faatula’i mai ai se numera e tolusefulu ma le toatolu (33) i latou sa tutupu mai ia te ia.

O le Aso Sa, 4 Novema 2012, sa faatuina ai la matou Aulotu/Ekalesia i elelee o Faleata ua ta’ua i lona tulaga faaleaganuu, o Vaipoto, a ua matou faaigoaina ia Nuufou ona o se aulotu fou ma o se Nuufou ua matou vavaneina ma amataina. O se tasi lea Matafale faavae o lenei aulotu, o le afioga i le tiakono ia Solofuti Fuauli Solofuti ma le faletua ia Sesa ma lona aiga ma lo latou tina matua ia Paea Solofuti. O se tina sa aulagia i se gasegase tuga, o ona aao (vae), ua le gafatia ona toe savali

ma ua nofofale ai lava o ia i nei tausaga e tele. Sa ou tuu asiasi pea lava ia te ia i taeao o Aso Toonai taitasi ma faatino la ma tatalo, ma fai tala e fa’ata ai ma faafiafia ai o ia. O se tina agamalū, tausaaafia ma lē lagona sona leo a e na o lana ‘ata lava e tali fiafia mai ai i la ma’ua mafutaga.

O lona sauniga faaleaiga sa faia lea i le Maota Maliu o Lialiga i le Aso Lulu, 7 Aokuso 2024 i le itula e 5.00 i le afiafi, o se sauniga sa faatinoina lava e lana fanau. Na ta’ita’i le susuga Elama Alao FS, tatalo Momoe Gagaeolo FS, lauga Pastor Sufia Alatua Solofuti, molimau ma pesepesega sa faia e lana fanau. O le itula 5.00pm o le Aso Tofi, sa aveeseina mai ai lona tino maliu mai le Maota Maliu ma momoli atu atu i lona maota i Nuufou ma faia uma ai sauniga mo lona toe po ma lona aiga faapea si a matou Aulotu.

O lona toe sauniga sa faia lea i le matou malumalu, EFKS Nuufou i le Aso Faraile 9 Aokuso 2024 i le 10.00am. Taitai – Susuga Tunumoso S. Iosia FT (Taitaifono Fono Tele), na molimoli lona sa i totonu o le malumalu e Atapana Tupuola Pati FS (faafeagaiga EFKS Satoalepai) ma fai le molimau a le EFKS Satoalepai; o le Tusi Paia na faitauina e Siasia Mataia FS (Faafeagaiga EFKS Vailoa tai), a o tatalo na saunia e Iamafana Faauuga FS (Faifeau Nofoaiga EFKS Nuufou). O le molimau faaleagaga, o le Lauga ma le Sauniga i le tuugamau, sa taitaiina e lana feagaiga, Letaulau Pesaleli FS, ma matou faatofa atu ai ia te ia, i le Pese Faamavae a le Au Kerisiano, *“Talofoa uso e, tofaina oe, Ua sau le itupo e malolo, E ala oe pe a mavae le po, Tofa, tofa, tofa.”* Tofaina oe tina, alu ia oe ma le manuia i lou Matai o loo faatalitali mai.

Na tauluga foi lona aso fiafia i osiga taulaga i le Atua, e ala i tausamiga ma fa’aaloaloga mauualuluga e masani ai aso faapitoa faapenei, na ma’au i ai le paia o aiga i paolo ma gafa, mo le afioga i le Taitaifono o le Fono Tele sa ta’ita’i le Sauniga, le aulaga a le Atua, ma lenei Aulotu i Nuufou Faleata. Faafetai le fa’aeaea i le galuega a le Atua, ia faamanuia ma toe faatumu atu, ma ia i le Atua le viiga, ona o oe tina Paea Solofuti Alo.

Saunia Letaulau Aloia Poufā Pesaleli FS,
EFKS Nuufou, Vaipoto,
Pulega Faleata Sisifo,
Matagaluega FALEATA.

ATA O E UA MALILIU

FEAGAIMAALI'I FAAVALE

IOSEFA SALA.



PAEA SOLOFUTI

ALO



O LE TAFATOLU FAALEA'OA'OGA

(Pepa Mafutaga Faafouina Aufaigaluega 2024)

The Teacher's Triad

